

立法會經濟事務委員會

2013年11月25日

講稿

多謝主席。

中電同政府就《管制計劃協議》2013年嘅中期檢討，進行咗有建設性嘅討論，並詳細考慮咗各個持份者嘅意見，至今已經完成磋商。雙方達成嘅協議，反映咗中電繼續致力為香港推廣節能環保嘅承諾，一方面係配合政府嘅政策，同時亦都正好係我哋未來一年嘅工作重點之一。

協議中成立新嘅能源效益基金，係根據兩家電力公司過往幾年獲發能源效益獎勵金嘅記錄，估計總共會向基金投入大約一億元，當中，中電喺未來四年內，會撥出約七千萬元，以配對方式資助非商業樓宇業主加強節能裝置。呢個新計劃，同我哋上兩個星期公佈，向社會有需要人士送贈「家電四寶」節能電器，以及我哋加大力度推廣節能公眾教育嘅計劃，都有著共同嘅目標。

另外，大家協議達成嘅改動，亦都涵蓋咗提升營運同服務水平、增加資訊透明度，同埋為客戶帶來經濟利益等方面嘅改進，同我哋一貫嘅業務方針互相配合。

我哋相信，2013年中期檢討，已經按照《管制計劃協議》嘅有效規管機制，達到不斷求進、致力提升服務嘅目的。

《管制計劃協議》係政府同電力公司簽訂嘅合約。中電秉持合約條文嘅規定，全力履行協議內訂明嘅責任。我哋以十年為期嘅合約作為基礎，作出詳細嘅規劃、投資以及相關財務安排，滿足客戶嘅電力需求，提供安全、可靠而環保嘅供電服務。

我哋在此期間，不間斷地作出龐大而長遠嘅投資，以配合香港嘅用電需求。如果喺合約期內改動主要條文，會對十年期間嘅規劃帶來

重大影響，亦都會影響到我哋為客戶提供嘅優質電力服務，同埋因此而帶來嘅利益。

喺目前《管制計劃協議》清晰嘅規管框架下，中電得以為客戶提供高度安全可靠、潔淨環保、價格合理嘅電力服務。我哋會貫徹過去112年嘅承諾，繼續為客戶同埋香港市民大眾，提供優質服務。

多謝主席。